

a2^r

Dem Wolge
bornen Herrn/ Herren
Hainrich von Kurtzbach/
Frey Herrn auff Trachenberg/
vnd Militfch/ Herrn auff Rhonau vnd
Helffenberg/ Fürftlicher Durchl. Ertz
Hertzoges Maximiliani zu Oefter
reich Cammer Herrn/ 7c. Mei
nem gnädigen Herrn.

Wolgeberner/ Gnä
diger Herr/ Da der H.
Prophet Elaias ſpricht
in feinem Guldnen Ca
pitel: Durch fein Er
kendtniß wird er/ mein Knecht/ der
Gerechte/ viel gerecht machen/ Deñ
er treget jre Sünde: Lehret er nicht
allein klar vnd deutlich/ das vns an
der Erkendtniß Jefu Chrifti all vn
fer Heyl vnd Seligkeit gelagen ſey/
Sondern wil vns auch zugleich
a ij trew

a2^v

Vorrede.

trewlich ermahnet haben/ das wir
 feinen Namen zuerkennen wol war-
 nemen/ vnd durch die gantze Zeit vn-
 fers Lebens/ vnfern höchften Fleiß
 daran wenden sollen.

Es stehet aber die Erkendtniß
 Jesu Chrifti/ laut der Schrifft/ in
 diesen zweyen Stücken:

- Rom. 1. Erftlich/ in der Erkendtniß sei-
 ner Person/ Denn er ist geboren aus
 dem Samen David nach dem Flei-
 sche/ vnd erweiset der Allmächtige
 Son Gottes nach dem Geift. Dar-
 nach in der Erkendtniß seines Am-
 ptes/ Denn das Blut Jesu Chrifti/
 1. Ioh. 1. des Sohns Gottes/ macht vns rein
 von aller Sünde.

Diese Stück beyde begreiffet der
 Prophet in dem obgemelten Spru-
 che/ deñ sie lassen sich nicht trennen
 Denn wer da nicht gleubet/ das Je-
 sus Chriftus wahrer Gott vnd wa-
 rer Mensch ist/ den hilffts nicht/ ob
 er gleich gleubet/ das er für vnfer
 Sünde gelitten habe. Vnd wer da
 nicht gleubet/ das er für vnfer Sün-
 de

a3^r

Vorrede.

de gelitten habe/ den hilffts nicht/
ob er gleich gleubet/ das er wahrer
Gott vnd wahrer Menfch fey.

Was hülffe es vns nu/ wenn wir
gleich die gantze Welt hetten/ vnd
kemen nicht zu der Gerechtigkeit/
die vor Gott gilt? Wie köndten wir
aber zu diefer Gerechtigkeit kömen
weñ wir den nicht kenneten/ der vns
für Gott gerecht machet? Wie fol-
ten wir jn aber auch erkennen/ wenn
wirs aus Gottes Wort/ weil es vns
von Natur vnbekandt ift/ nicht ler-
neten? Derhalben follten wir die
Worr des Propheten mercken/ vnd
zufehen/ das wir in der Erkendtniß
Jefu Chrifti/ vnfers HErrn vñ Hey-
landes/ wie S. Petrus fpricht/ alle-
zeit wachfen vnd zunemen.

1.Pet. 3

Weil aber der Satan/ der Ertz-
Feindt Chrifti/ vnd feiner Gemeine/
weiß/ das vns an der Erkendtniß
Chrifti fo viel gelegen ift/ hat er fich
von anbegin her/ zu allen Zeiten/ fehr
hefftig vnd grawfam dawider gele-
get/ vnd ift diefes jmerdar der aller

a iij groß

a3^v

Vorrede.

größte Schade gewefen/ den er in der Kirchen Chriffti gethan hat/ das er die Menfchē Kinder in diefer Erkendniß jrre gemacht/ vnd alfo von dem rechten Wege/ der zur Seligkeit führet/ abgeleitet hat.

Denn baldt hat er feine Gottheit geleugnet/ als durch die Pharifeer vnd Saduceer/ vnd hernach durch Cerinthum Ebionem vnd Seruetū: Baldt aber feine Menfchheit/ als durch Manetem/ Cerdonem vnd Marcionem.

Ein mal hat er feine einige Perfon getrennet/ als durch Neftorium: Das ander mal aber die zwo Naturen in einander vermifchet/ vnd jhre Eigenschafften auffgehoben/ als durch Eutychen: Jetzt hat er feine Gottheit eine Creatur geheiffen/ vñ fie dem Vater am Wefen vngleich gemacht/ als durch Arium: Jetzt aber feine Menfchheit zuftümelte/ vñ gefaget: Er habe einen Leib/ ohne die vernünftige Seele an fich genommen/ als durch Apolinarium.

Da

a4^r

Vorrede.

Da aber die heyligen Väter fleißig zufahen vnd so oft eine Ketzerey auff die Bahn kam/ in der Heyligen Schrift fleißig forscheten/ aus denselben die Ketzer widerlegeten/ die Erkendniß der Person Christi/ in den Concilien/ vnd jren Schrifften richtig fasseten/ Vñ auch die Christlichen Käyfer vnd Fürsten darüber hielten: Da greiff der Teuffel nach dem andern theyl der Erkendniß Christi/ Nemlich/ nach seinem Ampte vnd Verdienfte/ vnd brachte es/ durch Gottes Verhengniß/ wegen der Menschlichen Sicherheit vnd Vndanckbarkeit dahin/ daß das heilige Verdienst Jesu Christi fast gantz vñ gar aus der Kirchen vertilget ward.

Dieses Spiel hebet er auch mit aller Gewalt an/ zu diesen vnseren Zeiten. Denn nach dem das erfts theyl der Erkendniß Christi vnd seiner Person/ aus Göttlicher Schrift/ vnd einhelligem Consens/ der alten/ beyde Griechischen vñ Römischen Kirchen/ durch die thewre

a iij Män

a4^v

Vorrede.

Männer Gottes Lutherum vn Philippum/ wie die Augspurgifche Confession/ derfelben Apologia/ die Schmalkaldifchen Artickel/ 7c. bezeugē rein vn lauter auff vns bracht ift/ Vñ das ander theyl/ nemlich/ die Erkendtniß feines Ampts vnd Verdienftes/ durch jhre groffe Mühe vn Arbeit/ aus Göttlichem verleyhen/ wider gereiniget/ gantz tröftlich an Tag gegeben/ vnd alfo der Weg zur ewigen Gerechtigkeit vn Seligkeit vns gantz richtig gewiefen ift: Hat der Satan keine Ruhe/ fondern richtet hin vnd her in der Kirchen Gottes/ mit vnverwindlichen fchanden/ in derfelben Erkendtniß/ fonderlich aber/ was die Perfon Chrifti belanget/ viel jrrung vnd zwytracht an/ gedencket vns diefen Weg wider zuverlauffen/ im Glauben jrre zu machen/ vnd alfo des Ewigen Lebens zuberauben.

Weil denn nu gleiche Gefahr darauff ftehet/ Er neme vns das erfte/ oder das ander Theyl diefer heylfamen

a5^r

Vorrede.

men Erkendtniß/ vnd verftümmele
 vns Chrifti Perfon oder fein Ampt/
 So wil es warlich gerathen fein/
 das ein jeder feines Heyls warneme/
 vñ feinen HErrn vnd Chriftum recht
 vnd wol kennen lerne/ auff das er
 alle Jrrwege des Satans meiden/
 vnd auff der rechten Bahn/ biß an
 fein ende/ beftendig bleiben möge.

Es hats vns auch vnfer lieber
 HErr Chriftus an nützlichen Bü-
 chern vnd richtigen Lehrern zu ler-
 nen fein Erkendtniß nicht mangeln
 laffen. Denn vber daß/ das er vns
 fein Buch/ die heylige Bibel erhalten
 hat/ vnd vns zu vnfern Zeiten gantz
 lieblich vnd klar in vnfer Deutſche
 Sprache bringen laffen/ hat er auch
 allzeit viel feine trewe Lehrer/ bey-
 de in der alten Kirchen/ vnd zu vn-
 fern Zeiten erwecket/ durch welche
 er aus feinem heyligen Worte die
 rechte heylfame Erkendtniß feiner
 Perfon vnd feines Ampts herfür
 bracht erhalten/ fortgeplantzet/ vñ
 alle Ketzereyen widerleget hat.

a v Nu

a5^v

Vorrede.

Nu ift aber vnter den Büchern der heyligen Altväter/ fo von der rechten Erkendtniß/ fonderlich von der Perfon Chrifti gefchrieben habē/ der aller fürnemften eines: Die drey Dialogi oder Gefprech von der Perfon Jefu Chrifti/ des heyligen Theodreti/ welche er fonderlich wider den ſchädlichen vnnd Teuffliſchen Irrthumb des Eutyſchis/ der in Chriſto nicht zwo/ fondern nur eine Natur erkennete/ gefchrieben vnd gerichtet hat. Vnd zu vnfern Zeiten/ in dieſen ärgerlichen Streiten/ von der Perfon Chrifti/ fehr nützlich zu leſen ſein.

Diefer Theodoretus ift ein hochgelehrter/ vnd zu feinen Zeiten ein fehr berühmter Mann/ eines Vornemen Edlen Gefchlechts von Antiochia gewefen/ Vnd weil er ſich von Jugendt auff der Gottfeligkeit geflieffen/ auch von feinen Eltern/ welche frome Chriftliche Leute gewefen/ dazu gehalten/ vnd jhn Gott der HErr mit fonderlichen hohen Gaben

a6

Vorrede.

Gaben gezierer hatte/ ift er für andern herfür gezogen/ Vnd da er noch ein junger Mann gewefen/ zu einem Biſchoffe zu Cyro in Syrien erwelet worden/ welchem feinem Ampte er auch vber die XLIII. Jahr trewlich vnd Väterlich vorgeftanden hat.

Er ift auch darinnen wol geübet worden/ nicht allein/ weil zu derfelben Zeit auch der Rotten vñ Sectē kein ende war/ Sondern er ward auch feiner rechten Lehre halben eines mals deffelben entſetzt.

Denn als er/ wie er ſelber ſchreibet/ feines Ampts 26. Jahr trewlich gepflogen hatte/ biß auff das Mord Concilium zu Epheſo/ welchs im Jahr Chriſti 449. ift gehalten wordē/ ward er daſelbft feiner rechten Lehre halbē von Dioſcoro dem Ertz Biſchoffe zu Alexendria/ des Eutyſchis Patron/ abweſende/ ſampt andern trewen Biſchoffen/ feines Ampts beraubet/ vnd vom Käyſer in der Stadt Cyro beſtricket. Darüber er fehr klaget in feiner Epiftel/
die

a6^v

Vorrede.

die er an den Ertz Biſchoff Leonem
zu Rom geſchrieben/ welche ich zu
ende dieſes Buches/ ſampt der Ant-
wort Leonis/ vn̄ter andern auch mit
verdeutſchet/ vn̄ herzu gethan habe.

Weil aber in dieſem Concilio Ge-
walt für Recht gangen war/ brach-
tens die H. Väter/ ſonderlich Leo/
der Ertz Biſchoff zu Rom/ vnd Ana-
tolius/ der Ertz Biſchoff zu Conſtan-
tinopel/ durch fleißig anhalten bey
dem Kâyſer Marciano dahin/ das
bald hernach im Jahr Chriſti 451.
zu Chalcedon ein allgemein Conci-
lium gehalten ward/ auff welches
aus allen Landen der Chriſtenheit
630. Biſchoffe zuſam̄en kamen. In
dieſem Concilio ward der Jrrthūm
Eutyſchis verworffen/ vnd er ſampt
ſeinem Patron Dioſcoro verdam̄et/
vnd ins Elend verjaget. Theodore-
tus aber ward nicht allein wider in
ſein Ampt gefetzt/ ſondern auch von
den 630. Biſchoffen für einen rech-
ten Chriſtlichen Lehrer erkandt/ vn̄
alle ſeine Schrifften worden als gut
vnd

a7^r

Vorrede.

vnd heylfam befetiget/ Was jhm
auch für ein herrlich Zeugniß von
dem Stuel zu Rom gegeben wordē/
ift in der obgemelten Epiftel Leonis
an Theodoretum herrlich zusehen.

Dieweil deñ vnter feinen Schriff-
ten diefe drey Dialogi fehr köftliche
vnd gute Bücher fein/ welche von al-
len verftändigen vnd gelehrten Leu-
ten auch zu vnfern Zeiten/ wegen der
richtigkeit/ fo darinnen ift/ hoch ge-
achtet vnd fehr gelobet werden/
Habe ich fie erft/ vnd fürnemlich mir
felbft/ Darnach allen andern from-
men Chriften/ die nach dem Erkent-
niß der Warheit mit rechtem ernft
vnd eyver ftreben/ zur Lehre/ Vnter-
richt/ vnd Troft für mich genömen/
vñ in die Deutfche Sprache bracht.
Gleicher weife wie ich vor vier Jah-
ren die fchönen Epifteln des H. Igna-
tij auch verdeutfchet/ vnd in Druck
geben habe/ Dafür mir von vielen
fromen Hertzen fleiffig ift gedanckt
worden.

Bin auch der tröftlichen Zuver-
ficht/

a7^v

Vorrede.

licht/ mein lieber HErr Chriftus/ der
mir zu diefer Arbeit Gnade vnd Se-
gen gegeben hat/ werde verleyhen/
das fie vielen guthertzigen Leuten/
fo wegen der jetzigen Streiten be-
trübet/ vnd nicht wenig bekümmert
fein/ feinem heyligen Namen zu Eh-
ren/ nüt3 vnd dienftlich fein werde.

Was der Scopus vnd Jñhalt die-
fer dreyer Gefpreche fey/ laffe ich vn-
vermeldet/ dieweil es Theodoretus
felber in feiner eigen Vorrede/ fo her-
nach folgen wird/ gantz fleißig an-
zeigt. Insonderheit aber ift zu
mercken/ die feine ordnung vnd wei-
fe/ die er helt in allen dreyen Gefpre-
chen. Deñ er fetzet nichts aus feinem
eigenen Kopffe vnd Gutdüncken/
Sondern nimmet erftlich die H
Schrift für lich/ helt das Alte vnd
Newe Teftament gegē einander/ er-
klåret eines durch das ander/ vñ be-
weifet/ das feine Lehre dariñen feft
vnd wol gegründet fey. Erklåret
auch offtmals neben den Håuptleh-
ren etliche andere nöthige Stücke/
fo

a8^r

Vorrede.

So in vielen Artickeln gute nachricht
 tung geben.

Wenn er nu feine Lehre also auff
 den grund der heiligen Schrifft wol
 gebawet hat/ kömet er auch auff die
 Schrifften der H. Väter/ hebet an
 von S. Ignatio/ welcher der erste ist
 nach der Apostel Zeiten/ vnd fehret
 forth biß auff die/ So auch zu seinen
 Zeiten noch gelebet haben/ zeucht
 aus jnen an die herrlichsten/ schöne-
 sten Sprüche/ von der Erkendtniß
 Jesu Chrifti/ vñ derselben nicht we-
 nig/ sondern in groffer Anzahl in ei-
 nem jeglichen Gespreche/ darunter
 er auch vieler alten Väter Sprüche
 meldet/ welcher Schrifftē/ zu vnfern
 zeiten/ sonst nicht mehr verhanden
 sind. Daß also diß Buch nicht al-
 lein jederman das rechte Erkent-
 niß vnfers H. Er̄in vñ Heilandes
 Jesu Chrifti/ sonderlich was sei-
 ne Person belangt/ gründlich leh-
 ret vnd fñrhelt: Sondern auch
 durch seine gute Ordnung wei-
 set/ wie man noch heutiges Ta-
 ges

a8^v

Vorrede.

ges vielen groffen Sachen vnd
Streitten/ leicht vnd ohn Erger-
niß/ abhelffen köndte.

Weil aber der Drucker anderer Ge-
schäfte halben/ mit diefem Werck vber die
zwey Jahr verzogen/ hab ich in des auch et-
liche schöne Epifteln/ des hochlöblichen vñ
hochgelehrten Mannes Leonis/ des Ertz-
Bifchoffs zu Rom/ welche er von dem Er-
tendtniß vnfers HErrn Jefu/ vmb diefel-
be Zeit wider den Eutychen gefchrieben/
dazu gethan vnd verdeutchet. Sonderlich
die lange vnd fehr schöne Epiftel/ die er von
dem Mord Concilio an Flavianum den
Ertz Bifchoff zu Conftantinopel gefchrie-
ben/ welche nicht allein hernach im Syno-
do Chalcedonenfi öffentlich verlefen/ vñ
von den heyligen Vätern/ Columna recte
fidei/ das ift/ die Seul des rechten Chrift-
lichen Glaubens genennet wordē ift/ Son-
dern auch gleich ein Außbund ift/ alles des/
was von der Perfon vnd zwoen Naturen
vnfers HErrn Chrifti zu wiffen von nö-
ten ift.

Darnach auch etliche andere Epifteln/
die er vmb diefelbe Zeit an etliche Bifchof-
fe/ vñ andere wider des Eutychis ſchwarm
gefchrieben/ Vnter welchen auch ift eine
Epiftel

b1^r

Vorrede.

Epiftel Theodreti/ fo er an denfelben
Ertz Biſchoff Leonem geſchrieben/ darin
nen er ſich feiner Abſetzung halben beklagt/
vnd bey jm Raths erholet/ ſampt der Ant-
wort Leonis an Theodoretum. Aber da
von habe ich drunten in der Vorrede/ vber
dieſelben Epifteln/ mehr Bericht gethan.

Solche meine Arbeit/ Gnädiger Herr/
habe ich vnter E. Gn. Namen in Druck
gehen laſſen/ vnd publiciren wollen/ weil
mir nicht vnbeuoft/ das E. G. nicht allein
von Jugendt auff/ durch E. G. Præcepto-
res beyde privatim/ vnd in der hochlöblichē
Vniuerſitet Wittenberg/ zu ſolchen vnd
dergleichen reinen Schrifften geleitet/ in
der rechten vnverfälfchten Lehre/ vom Er-
kennniß Jefu Chrifti wol vnterrichtet
ſein/ Ja noch heute die Studia pietatis ne-
ben E. Gn. glücklicher Regierung/ nicht
vnterlaſſen/ vnd ſich gegen allen verftendi-
gen vnd gelehrten Leuten/ als einen recht
Günſtigen Mæcenatem erzeigen/ Son-
dern auch/ weil ſich E. Gn. fo oft die auff
dem Burg Lehn zur Sprottau gewefen/ ge-
demütiget/ vnd vnſere Gemeine beſuchet/
auch mit fonderlicher angeborner Gunft
vñ Verehrungen gegen mir erzeiget haben.

Derhalben Gnädiger Herr/ weil gegen
E. Gn. ich mich auff keine andere weiſe

b danck

b1^v

Vorrede.

danckbar zuerzeigen weiß/ als mit einem
folchen Dinge/ das ich nach Vermögen/
durch Gottes verleyhen geben kan/ Bitte
E. Gn. ich gantz demütig vnd vnterthenig/
E. Gn. wollen jnen diefe meine Dedic-
tion gnädig gefallen laffen/ vnd E. Gn.
mich/ sampt meiner Gemeine allezeit in
Gnaden laffen befohlen fein.

Thue hiermit Ewer Gnaden/ sampt
Ewerer Gnaden gantzem Hofe/ in des All-
mächtigen Hulde vnd Schutz befehlen.
Zur Sprottau/ den Achtzehenden Aprilis/
im Jahr nach der Geburth vnfers HErrn
vnd Heylandes Jesu Chriftri 1582.

E. Gn.

Vntertheniger vnd
Geflieffener

Martinus Mollerus.

Mm8^r

Vorrede.

Vorrede auff die folgen^d
den Epifteln Leonis vnd anderer
Väter/ wider die Ketzerey des
Eutyichis.

DJeweil ich etliche fchöne Epi^d
fteln des Leonis vnd anderer Väter/
fo dazumal wider den Eutyichen/ vnd
feinen Anhang/ auch gefchrieben/ herzu fe^d
tzen wollen/ Sol ich auch nicht vnterlaßen/
des Eutyichis vnd feines Jrrthumb^s vorher
zu gedencken/ Auff das folche Epifteln mit
defto mehrem Nutz mögen gelesen werden.

Im Jahr nach Chriffti Geburth 447.
war ein Abt zu Conftantinopel/ vnter dem
Ertz Biſchoff Flaviano/ mit Namen Eutyiches/
Der verfteig ſich in hefftiger Widerlegung
der Jrrthumb Neftorij/ vnd gerieth in einen
folchen Jrrthumb: Er bekenne/ ſprach er/
Das vor der Menſchwerdung vnſers HEr^d
ren Jefu Chriffti weren 3wo Naturen gewe^d
fen/ Die Gottheit vnd die Menſchheit/ Aber
nach der Vereinigung were eine Natur da^d
raus worden. Denn alfo vermeinete er die
Einigkeit der Perſon zuerhalten/ vñ die 3u^d
trennung wider Neftorium zuverhüten. Leh^d
rete auch: Der Leib des HErrn were nicht
vnſer Natur vñ Wefens/ noch aus Menſch^d
lichem Samen/ Sondern er nennete jn zwar
einen Menſchlichen Leib/ doch der da nicht
ſey eines Wefens weder mit vns/ noch mit
feiner Mutter. Vnd folche feine Meinung iſt

zu ſehen

Eutyiches
vnd fein
Jrrthumb.

Mm8^v

Vorrede.

zu fehen in den zweyen Epifteln Flaviani/ fo bald hernach zum erften folgen werden.

Flavianus verhüret den Eutytychen.

Als nu folches Flavianus der frome Patriarch innen ward/ verfamlete er baldt des folgenden Jahrs zu fich gen Conftantino pel bey 30. Bifchoffe/ fo vnter jm waren/ den Eutytychen zu verhören/ Welcher/ als er feinen Jrrthumb für jnen öffentlich heraus fagte/ ward er vom Flaviano der Prieftlerlichen Wirden entfetzet/ vnd feiner Abtey beraubt.

Flavianus fant dem Lewi des Eutytychis Jrrthumb zu wiffen. Leo antwort dem Flavius.

Nach diefer Abfetzung des Eutytychis/ fchreibet Flavianus den gantzen Handel an Leonem den Ertz Bifchoff zu Rom/ wie in den folgenden den erftē Epifteln zusehen. Derfelbige als ein fromer/ anfehenlicher vnd fürtrefflicher Mann/ beantwortet jn/ nach dem er Die Sache mit den feinen erwogen/ mit einer faft langen Epiftel/ die vnter den folgenden Epifteln die Dritte ift/ Welche hernach in dem allgemeinen Concilio zu Chalcedon nicht allein in groffem Anfehen gewefen/ fondern auch die Seul des rechten Chriftlichē Glaubens ift genennet worden.

Leo fchreibet wider den Eutytychen.

In derfelbigen Epiftel faget Leo/ es fey recht vnd wol gethan/ das der Ketzter Eutytyches abgefetzt fey/ Beweifet auch gantz fchön vnd nichtig aus der Heyligen Schrifft/ das feine Lehr ein fchädlicher Jrrthumb fey/ vñ faffet die gantze Lehre von der Perfon Chrifti/ fo rundt vnd richtig/ das dieselbe Epiftel wol ein Außbundt ift alles des/ was von Chrifti Perfon/ vnd den zwoen Naturen in jm zu wiffen von nöthen ift.

Dazumal

Nn1^r

Vorrede.

Dazumal hat Leo auch die schöne Epistel geschrieben an die Gottfelige frome Kayserin Pulcheriam/ Deßgleichen auch an den Bischoff Iulianum zu Coë/ welche beyde hernach auch verdeutschet vnd zu finden sind/ vnd gar guten Bericht geben/ von der Menschwerdung Jesu Christi/ wider den Irrthumb des Eutyichis.

Nach dem aber Eutyches abgesetzt/ hielt er sich gen Hofe/ nam den fromen Kayser Theodosium durch etliche vorneme Råthe ein/ vnd beklagte sich offft/ wie jm vom Flaviano groß vnrecht geschehen were. Derhalben ließ der Kayser ein allgemein Concilium zu Epheso halten/ im Jahr nach Christi Geburt 449. vnd dafelbst den Eutychen noch ein mal verhören.

Weil aber Dioscorus der Bischoff zu Alexandria/ des Eutyichis Patron/ in diesem Concilio Præfident war/ vnd den Vorzug hatte/ welch ein Chryfapius des Kayfers Kåmerling Schutz hielt/ vertuschete er die obgemelte Epistel Leonis/ ließ Gewalt für Recht gehen/ Rechtfertigte den Eutychen/ vñ billichet seinen Irrthumb Flavianus aber der frome Patriarch ward mit Gewalt aus dem Concilio gestoffen/ vnd mit Füßen dermassen gestreten/ das er vber wenig Tage hernach starb/ Darvmb es auch das Mordt Concilium ist genennet worden.

Theodoretus vnd andere/ so dem öffentlichen Irrthumb des Eutyichis nicht Beyfall geben woltē/ worden abwesende vñ vnverhört verdamet, vnd jrer Empter entsetzt.

Leonis andere schriftten wider Eutychen.

Eutyches holt sich gen Hofe.

Theodosio ftellet das Concilium an zu Epheso.

Dioscorus des Eutyichis Patron/ laffet Gewalt für Recht heiffen.

Flavianus kömpt vmb sein Leben.

Mordt Concilium.

Theodoretus abwesende seines Ampts entsetzet.

Nn1^v

Vorrede.

Des tröftet den Theodoretum.

Welcher groffen Vnbilligkeit sich auch Theodoretus gegen dem Leone beklaget in einer sehr schönen Epiftel/ Darauff jm auch Leo gantz freundlich vnd Brüderlich geantwortet hat/ Wie hernach beyder Epifteln verdeutfchet zu finden/ vnd sehr nützlich zu lesen find.

Leo erhelt ein ander allgemein Concilium

Concilium zu Chalcedon.

Eutyches verdampt sampt dem Diofcoro.

Weil aber folches dem Römifchen Ertzbiſchoff Leoni trefflich wehe that/ ſchreibet er nicht allein an die Prieſterſchafft/ vñ gantze Gemeine zu Conſtantinopel/ wie hernach zu ſehen/ vnd tröftet ſie vber iren frommen Biſchoff/ der ſo bößlich vmbkommen war/ Bey welches Lehre ſie als frome Hertzgen/ noch feſte hielten/ Sondern er helt auch neben dem Patriarchen Anatolio/ der an des Flaviani ftatt kommen war/ bey dem Käyſer an/ vmb ein ander allgemein Concilium welches auch vber zwey Jahr hernach im Jahr Chriſti 451. da Käyſer Theodoſius todt war/ vnter dem Käyſer Martiano/ zu Chalcedon in Bithynien gehalten ward.

Dafelbeft hin kamen aus allen Landen 630. Biſchoff zuſammen/ vnd war der Käyſer perſönlich gegenwertig. In demſelben Concilio worden alle Handlungē des Mord-Concilij verworffen/ Eutyche Lehre verdammet/ Diofcoro/ nach dem er dreymal zum Concilio erfordert/ nicht kam/ ſampt dem Eutyche wider abgefetzt/ vnd ins Elend verwieſen. Die andern Biſchoffe aber/ ſo zuvor vnbillicher weiſe irer Empter entfetzt/ wider in jre Biſchoffthümbe eingewieſen.

Als

Nn2^r

Vorrede.

Als nu in diefem Concilio die fchöne lan-
ge Epiftel Leonis/ welche er zuvor an Flavia-
num gefchrieben hatte/ öffentlich abgelefen/
wol bewogen/ vnd fleißig examinirt ward/
fchryhen die heyligen Väter einhellig: Das
ift der rechte Glaube/ Das ift der Heylige
Glaube/ Das ift der ewige Glaube/ darin-
nen find wir getaufft/ Darinnen täuffen
wir/ Also glauben wir alle/ Das ift der Vā-
ter Glaube/ Das ift der Apoftel Glaube/
Verflucht fey/ der nicht also gleubet.

Da auch das decretum oder Symbolum
diefes Concilij getellet/ vnd darinnen diefe
Wort/ Ex duabus naturis/ gelesen worden/
er-
hub fich ein großer Zweifel vnter den hey-
ligen Vätern/ Ob es recht geredet were?
Welches/ als es die Præfidenten fahen/ die
vom Kåyfer dem Synodo zugeordnet warē/
fprachen fie: Diofcorus hat diefe Wort/ ex
duabus naturis gebraucht/ Der heylige Leo
aber fpricht: Chriftus habe 3wo Naturen
ohne Verenderung/ ohne Vermifchung/
vnd ohne Zutrennung. Welchem folget ir-
nu/ dem Diofcoro/ oder dem Leone? Da ftun-
den die heyligen Väter alle auff/ vñ fprachē:
Wir glauben wie Leo/ Verflucht aber fey
Diofcorus.

Nach diefem Concilio fchreibe Leo auch
an den Biſchoff Iuvenalem zu Jerufalem
Deßgleichen auch an die Brüder im heyli-
gen Lande. Vnd ftraffet erftlich den Bi-
ſchoff/ das er dem Jrrthumb des Eutychis

Leoni Epi-
ftel vom
gantzen
Concilio
approbi-
ret.

Leonis
andere
Schrift-
ten.

Nn2^v

Vorrede.

beygefallē war/ Darnach auch die Brûder/
das sie zu vrel gethan habe/ vnd gibt ihnen
gründlichen Vnterricht wider den Eutychen.
Letzlichen/ hat er auch einen sehr schönen be-
richt von diefem gantzē Handel an den Kây
fer Leonem geschrieben/ im Jahr nach Chri-
fti Geburth 458. welch es alles hernach
Deutlich mag gelesen werden.

Trage also keinen Zweifel/ es werde
der Chriftliche Leer in diefen schönen Epi-
fteln seines Hertzten Luft finden/ vnd GOTT
dem HErrn dancken/ der sie biß auff vnere
Zeit erhalten/ vñ verliehen hat/ das sie auch
im Deutlichen mögen gelesen werden.

Solches hab ich darvmb zur Vorrede
vber diefe folgende Epifteln fetzen wollen/
damit sie ihr gebührliches Anfehen ha-
ben/ vnd mit desto mehrer
fleiß vnd nachdencken
mögen gelesen
werden.

Die